

MEJE PO CARTE COPIYA PABLO TATINA, TIMOTEO TATINATSI

Meje yabara poxonae Pablo tamropata pitaba xua tatina, Timoteo tatinatsi

1 ¹Jaco Timoteo. Xan, Pablon, Jesucristo pia peitorobi jiwi jiwana tatsin. Nacom pon Wanacacapanenebiyaein neitoroba. Matautano Jesucristo, pon Pecanamataxeinaein jiwi, pon wɔnae ewatatsi iruru neitoroba. ²Timoteo, xam cata tinatsi barapo carte, xam bara xaniwaicha be taxantom canatsicotainchi, tsipei cayawenatsi xua nejume cowuntsiwa Nacom. Ichichipan xua Nacom pon Waxa, iru Cristo Jesús, pon Wanacanamataxeinaein, baponbe bara amanaya cayawenaena pia necaantobexaebe. Matautano ichichipan xua baponbe nantanuweya cayabara nanta xeinaenabe pia necayawenaenexabe. Matautano ichichipan xua juntea popona jinya necaexanaenexabe.

Meje yabara xua Pablo yabara muxuweta pomona abeya pecuidubiwi pia pecuidubi coyenewa tatsi pecuiyainwa

³Poxonae matha cain muxu taponae Macedonia nacua beya, bapoxonae jume daunweya cajeichi, janje: “Ecare Efeso tomaratha jinya necui itorobinexa tsane pomona abeya pecuidubiwi pia pecuidubi coyenewatha. Barapomona seicayiia cuiduba ichi be jopa paxan ichiyo pomona Jesucristo pia peitorobi jiwi tatsi panxaein. Itorobare xua barapomona jopa cuidubi tsane ichamonaetha barapo coyene po coyene xua jopa xainyeyo. ⁴Matautano barapomona jopa bewa juntu coyene enae tsainchi po diwesin xua pia pamo susato jiwi tatsi paeba po diwesin xua pejemai diwesin, matautano po ayei diwesinno, xua pia pamo susato jiwi tatsi yabara”, cajeichi. Barapo diwesin saya jiwi najume matsontsonoba exana. Barapo diwesin jopa naca yawenaeyo xua beta wacanamataxeinaewa Nacom piamona wajume cowuntsixae Nacom.

⁵Xua tapanaxae xua barapo peitorobi coyenewatha paeba apara xua daxita jiwi nantiya caemona penaantobenexa tsane. Barapo peantobe

coyenewa jiwi pia jũntũ coyene wetsina pona poxonaē pia jũntũ coyenein xanepana xua jopa xeinaeyo peabe coyenewa yawa poxonaē barapo jiwi pia coutha najũntũ coyene tsipaeba xua jopa peexanaenexa peabe coyenewa Nacomtha. Yawa barapo peantobewa jiwi pia jũntũ coyene wetsina pona poxonaē barapo jiwi xaniwaicha jume cowũnta Nacomtha. ⁶Ichamonae jopa xeinaeyo barapo peantobe coyenewa poxoru jume itaweta, mataũtano poxoru najũntũ coyene eena exana penajume matsontsonobi diwesin. ⁷Barapomonae ichichipa becuidubina Nacom pia peitorobi diwesi jume. Bequein barapomonae baxua exana, ichitha jopa beta exanaeyo tsipei jopa yabara yaputaeyo Nacom pia peitorobi diwesi jume. Mataũtano barapomonae jopa yabara yaputaeyo po coyeneya xua atsaquiya yabara cuiduba ichamonae Moisés pia peitorobi diwesi jume.

⁸Bara yaputainchi xua Moisés pia peitorobi diwesi wũnaē jiwi nexa, icha po jiwi cuiduba barapo diwesi, bara xaniwaicha cuiduba icha be pocotsi coyeneya xua Nacom ichichipa. ⁹⁻¹⁰Waxainchi mataũtano yaputainchi xua Nacom pia peitorobi diwesi jume jopa barapomonae nexiyo pomonae bayatha pejũntũ coyene xeicaewi tsipei daxita coyenein ba beta peexanaewi. Jame barapo Nacom pia peitorobi jume, barapomonae nexa pomonae meje: pomonae jopa exanaeyo pocotsiwa Nacom pia peitorobi diwesi jumetha itoroba; pomonae jopa jume cowũntsiyo Nacom; pomonae jopa ichipaeyo Nacom; pomonae abe peexanaewi; pomonae jopa jũntũ coyene xanepanaeyo Nacomtha; pomonae aichaxaibi Nacom pia peitorobi diwesi jume; pomonae pia paxeíwi pebewi; pomonae pia pena jiwi pebewi; pomonae jiwi pejutebiwi; pomonae penata siwa xeinaewi yabũxitha xua jopa piseuri jiwi; pomonae cae pebiwi penaisamaichi jiwi xua be yabũxi penatsicotae jiwi; pomonae paratixi xeineiba xua ichamonae pejiwana noteibixaetsi poxonaē equeicha caewa pejiwana canawibeibixaetsi; pomonae jiwi pemuxuitorobiwi; pomonae naerabiya jume daunweya paeba xua ichamonae naerabiya peyabara paebiwatsi. Barapo peitorobi jume irũrũ barapomonae nexa daxita pomonae seicayiya yabara jume toxechiya exana po coyene xua Jesucristo pia pexeinya pecuidubi coyenewa. ¹¹Barapo pexeinya pecuidubi coyenewa, bara najume jũpabe Nacom pia pexeinya jume diwesi tatsi, po diwesi yabara po coyene xua Nacom bara bichocono pexanepanaein, xuano bichocono pejũntũ coyene weiweinaein. Barapo diwesibe Nacom itoroba xua tacueicueijeíwa tsane.

Meje yabara poxonaē Pablo jũntũ coyene weiweina Jesucristo

¹²“Jũntũ coyene weiweinan tanecatsixaemxae peantũyapusũwa”, jan Jesucristo, pon Wanacanamataxeinaein. Bapon necata peantũyapusũwa tacueicueijeíwa tsane jiwitha Nacom pia Pexeinya jume diwesi tatsi. Bapon neyabara nanta xeina xua bara beta jume cowũntan,

daxota necana exana xua xan pia petanacuichin tatsin. ¹³Bapon baxua inta exana bequein bara bayatha bapon abeya yabara paeban. Matautano bapon piamonaetha tatsi abeya tacana exanan. Matautano abeya tayabara paeban barapo pijimonaetha tatsitha pomonaetha pomonaetha pia pejume cowuntsi jiwixaetsi. Ichitha Nacom nantanuweya neyabara nanta xeina pia tana neyawenaenexa, tsipei bapoxonaetha jopa jume cowuntsinyo Jesucristo poxonaetha abe exanan. Matautano jopa yaputaeyinyo pocotsiwa xua bayatha exanan. ¹⁴Daxota Nacom pon Wanacanamataxeinaein bichocono amanaya neyawena taneantobexae. Nacom nejuntũ coyene yũca exana po pejume cowuntsiwa xuano xua po peantobewa tsita xeinatsi Cristo Jesús.

¹⁵Cristo Jesús patopeica po cae pin nacuathe tsique pecapanenebiyaenexa tsainchi pomonaetha abe peexanaetha jiwi, xua capanenebiyatsi abe pia peexanaetha cuiro coyenein weya. Pomonaetha abe peexanaetha jiwi barapomonaetha jiwanan xua bichocono abe taexanaein beyacaincha barapomonaetha poxonaetha abe exana. Baxuan apara xainyei pocotsiwa xua yabara paeban. Jiwi bewa jume cowuntsina baxuan. ¹⁶Bequein bichocono abe taexanaein, daichitha Nacom nantanuweya neyabara nanta xeina pia tana neyawenaewa tsane. Tsipei xan pon Jesucristo nenaitata exana jiwitha, xua bayatha tana necui yabara ewatsixae xua tajume cowuntsiwa tsane Jesucristoetha xua poxonaetha jopa aitaconaeyo. Daxota ichamonaetha poxonaetha netaena Nacom exanaena xua barapomonaetha Jesucristo pejume cowuntsiwa tsainchi, pexeinaenexa peantuyapusuwa po peantuyapusuwa xua ataya tsiteca. ¹⁷Nacom, wũnae paca jaintatsi: “iXam Nacom pon ataya jiwi itorobiya pepa Neewatsin! iXam Nacom pon bapana jopa tũpaem tsane! iXam pon xua jiwi jopa itacũpaetsi xua necataewa! iXam yatsicaewa compam pepa Nacomũm! iAtaya paca tsita barũ cui itura jinatsi! iBarabũ ataya jiwi wũnae cajainchina! Je bara ichi tsane”, paca jeichi Nacom.

¹⁸⁻¹⁹Xam, Timoteom, bara xaniwaicha be taxantom canatsicotainchi. Caitorobatsi ichi be pocotsi coyeneya bayatha Nacom pia peitorobi jume pepaebiwi caitoroba poxonaetha cayabara tsiwũnae muxu duta xua bexa cuidubiname jiwitha Nacom pia pexeinya jume diwesi. Xan caitorobatsi icha be pocotsi coyeneya bayatha barapomonaetha caitoroba. Cajechi: Jume daunweya antuyapusũya beta exande Nacom pia petanacuichiwa tatsi. Poxonaetha baxua exaname, beta jume cowuntsiya exande, yawa pexeinya jũntũ coyene xeinare po jũntũ coyene xua xainyeya natsipaebame, xua jopa abe exanaem Nacomtha, cajechi. Ichamonaetha bequein beta natsipaeba pijũntũ coyeneintha, ichitha barapomonaetha najũntũ coyene barapenta po coyene Jesucristo pejume cowuntsiwatsi tsipei jopa jume cowuntsiyo pocotsiwa pia jũntũ coyene tsipaebatsi. ²⁰Barapocotsi coyene Himeneo exana irũrũ Alejandro exanarũ. Baponbe caenaetanbe pon

caurimonae pia pentacaponaeintha tatsi pon Satanás beya poxonae baraponbe nacuidubinabe xua jopa bewa abe yabara paebi tsanebe Nacomtha.

**Meje yabara xua Pablo yabara cuiduba po
coyene xua Nacomtha petsipaebiwa**

2 ¹Copiya caitorobatsi baxuanje xua exanaename: Nacomtha tsipaebare daxita jiwi nexa; Nacomtha wūcare xua Nacom peyawenaenexa daxita jiwi; yawa jande Nacomtha: “Nacom, maisa jūntū coyene weiweinan xua daxita xanepanaya jinya netaexanaewam jiwi”, jande. ²Bewa Nacomtha tawūcaename daxita nacua peewatsiwimonae. Mataūtano bewa Nacomtha tawūcaename daxita pentacaponawimonae. Baxua bewa exanaename xua jūntema beta wajume cowūnta dubenanaebiyaenexa Nacomtha, yawa jūntema wajinompaenexa jiwi peitūtha. Barapo jūntema wajinompawea bara bewa Nacom tsita xeinaeinchi barapo coyene, yawa bara jiwi xaniwaicha naca cui tane xua bara beta xaniwaicha jinompatsi daxita carepaya coyene cuintha. ³Barapo coyenein jame Nacom tsita wūnaetsi pon Wanacapanenebiyaein. ⁴Nacom bichocono ichipa xua daxita jiwi pecapanenebiwa tsainchi abe pia peexanae cuiru coyenein weya. Mataūtano Nacom ichichipa xua jiwi yaputaena pocotsiwa xua pexainyei coyenewa. ⁵Meisa compa Nacom pon pepa Nacom, bapon meisa popona. Barichi saya meisa caein pon itacūpatsi xua jiwi yabara jume yawenatsi Nacomtha, apara barapon Jesucristo. ⁶Jesucristo copata xua bara naetotha tsitūpa xua daxita jiwi yantomatatsi xua jiwi pecapanenebiyaenexa tsainchi abe pia peexanae cuiru coyenein weya tatsi. Poxonae Jesús tūpa naetotha, baxua tsita itapeinya xeina xua Nacom Pexanto itoroba po mataqueitha Nacom peichichipaexae xua daxita jiwi pecapanenebiwa tsainchi. ⁷Daxota Nacom newūn duta, jeye: “Bapon apara pon tajume diwesi pecaponaein yawa bapon taitorobi jiwi jiwānāpin”, jei Nacom. Bara xaniyeya paeban, jopa naerabinyo. Daxota Nacom neitoroba tacuidubinexa pomonaetha pomonae jopa judiomonae naexanaeyo xua Nacomtha pejume cowūntsiwa yabara yawano xua Nacom pia pexainyeiwa yabarano tatsi.

⁸Daxota ichichipan xua daxita nacuanpiwi Nacom pewūcaewa tsainchi. Poxonae wūcaena Nacomtha bewa namaxū yoichaena xua yatsicaewa pexeinaexae tsane pejūntū coyene xanepanaewa. Mataūtano jopa bewa yajūntū coyeneya paebi tsane xua peita aenae-aeineiwa ichūnthā. Mataūtano jopa bewa yajūntū coyeneya paebi tsane xua penajume matsontsonobi coyenewa. ⁹Ichichipan xua yabūxi nama xatabina pocotsi paparuwa be conotha wūnae. Saya uuranaya jinompaena xua bichocono jopa atsaqui tsane xua pebarū yūyūjeiwa pebiwitha. Jopa bichocono

wunaeya nantana fabi tsane. Jopa bichocono nantana pepena exanae tsane pocotsiwatha xua bichocono ainya matoman, pocotsiwa pewun oro, matautano pocotsiwa pewun perlan. Matautano jopa namaxatabi tsane pocotsi paparuwa bichocono ainya matoma. ¹⁰Jame yabuxi bewa exanaena pocotsiwa jiwi tsita coyene xanepanatsi, xua pocotsi coyene jiwi yawenatsi. Baxuan jame bichocono wuna xua yabuxi exana, po yabuxi xaniwaicha jume cowuntsiya jinompa xua Nacom pejume cowuntsiwatsi. ¹¹Yabuxi bewa saya moya jume naitawatsiya jume taena pocotsiwa xua nacuiduba. Saya bewa moya jume jejei tsane. ¹²Tsipei yabuxi jopa copatsinyo xua cuidubina Nacom Pejume Diwesi pin bicheito itabaratha. Matautano jopa copatsinyo xua yabuxi pentacaponaeawi penaexanaewa tsane pebiwi nexa. Jame bewa yabuxi saya moya enaena poxona pejume cowuntsiwi nacaetuta xua Nacom wuna pejainchinexatsi. ¹³Tsipei Nacom copiya exana pebin pon pewun Adán, bapoxona yabuyo exainchi powa pewun Eva. ¹⁴Caena bayatha Adán jopa muxujainyabichi pon caurimonae pia pentacaponaein tatsi xua abe peexanaewa tsane. Apra jame bapowa Eva muxujainyabatsi, daxota bapowa abe exana. ¹⁵Bequein yabuyo atene poxona tanaexanatsi pexuyo, ichitha Nacom capanepaena bapowa icha bapowa jume cowuntsiya poponaena Nacomtha, yawa icha antobeya poponaena, yawa icha betiya poponaena xua yatsicaewa Nacom nexa, yawa icha ita uuranaya poponaena Nacomtha.

**Meje yabara xua bewa exanaena pomonae
pecanamataxeinaewi pejume cowuntsiwi**

3 ¹Baraxua bara xainyei xua paca tsipaebatsi. Icha pebin ichichipa naexanaena xua pomonae Nacom pejume cowuntsiwichi pecanamataxeinaewatsi, bara baxua bara xanepana. ²Daxota pon pomonae Nacom pejume cowuntsiwi canamataxeinatsi, bapon bewa xanepanaya beta poponaena xua bapon jopa abe peyabara paebinexa tsainchi ichamonae. Bapon bewa saya cae piseuri baru jijinaena. Matautano bapon jopa bewa bichocono apae tsane xua vino mera pia beta penanta xeinaenexa. Bapon bewa beta nayaputane exanaena, xua daxota xanepanaya peexanaewa tsane, xua bapoxona ichamonae bapon xanepanaya peyabara nanta xeinaewa tsainchi. Bapon bewa matenta weiweinaya wabeibina pomonae petapateibeibixaetsi pia botha. Bapon ba pia cui xeina xua beta cuidubina ichamonaetha. ³Bapon jopa bewa nacupa exanae tsane peatsaxae mera. Yawano jopa bewa bapon naba exanae tsane, saya jame bewa juntema poponaena. Bapon jopa bewa najume matsontsonoba exanae tsane. Yawano bapon jopa bewa pitaparatixichi xua paratixi peasiwiwa. ⁴Bapon bewa beta itorobiya canamataxeinaena pia bomonae matabuxuyo. Matautano bapon bewa

pia pexui jume naitaewatichi poxonae itorobeiba pia pexui. Yawa pia pexui bewa tsita xeinaetsi pebaru itura jinae coyenewa. ⁵Icha barapocotsi jiton ita coxanatsi xua beta itorobiya canamataxeina pia bomonae matabuxayo, bapon nexata jopa itacupaetsi xua canamataxeina Nacom nexa pomonae Nacom pejume cowuntsiwixaetsi. ⁶Pebin jopa bewa naexanae tsane xua pomonae Nacom pejume cowuntsiwichi pecanamataxeinaewatsi poxonae cataunxuae abu pena pejume cowuntsin Jesucristo. Icha bapon pena pejume cowuntsin tsipae Jesucristo, metha bapon aebichipa nawita jiwitha, bapoxonae Nacom cana exanaetsipa bapontha, icha be pocotsi coyeneya ichi poxonae caurimonae pia pentacaponaein tatsi itawetatsi, xua Nacom itaweta pia nacua weya, xua Nacom peabixaetsi. ⁷Matautano bapon bewa beta poponaena, xua pomonae jopa pejume cowuntsiwi Nacom bapon beta peyabara nanta xeinaenexa tsainchi. Icha bapon jopa beta poponae tsane, bapoxonae jiwi abeya yabara paebina, bapon abeya yabara paebinchi. Yawano metha bapon exanaetsipa pocotsiwa caurimonae pia pentacaponaein tatsi cui jujuta xua po cui coyeneyatha bapon peexanaenexa.

**Meje yabara pomonae jiwi peyawenaewi
pomonaetha pomonae pejume cowuntsiwi**

⁸Barichiru pomonae jiwi peyawenaewi pomonaetha pomonae pejume cowuntsiwi, xua peyawenaewi peatenewitha, xua muxunano peapatsiwano peacopeibiwatha, barapomonae bewa beta jinompae, xua jiwi pebaru cui itura jinaenexa barapomonaetha. Matautano barapomonae jopa bewa icha caununaya paebi tsane. Jopa barapomonae nacupa exanae tsane peatsaxae meran. Matautano jopa bewa pitaparatiwixi tsane xua paratiwixi peasiwiwa. ⁹Barapomonae bewa beta jume cowuntsi Jesucristo po coyene xua Nacom yabara tsita ituta xua wajume cowuntsiwa, yawano barapomonae bewa muxuna xeinae po juntu coyenetha beta xaniwaicha natsipaebatsi xua jopa abe exanaetsi Nacomtha. ¹⁰Bara matha bu ichamonae cui jujutsina barapomonaetha icha beta xaniwaicha jinompa yawa icha ichamonae jopa abeya yabara paebiyo barapomonaetha. Bapoxonae barapomonae cana exanaeinchi pomonae jiwi peyawenaewi pomonaetha pomonae pejume cowuntsiwi, xua peyawenaewi peatenewitha, xua muxunano peapatsiwano peacopeibiwatha. ¹¹Barichi yabuxi bewa beta jinompaena xua barapowaxi pebaru cui itura jinaewa tsainchi jiwi. Jopa bewa bapowaxi abe yabara paebi tsane ichamonae, xua ichamonae abe peexanaexae. Matautano bapowaxi jopa bewa bichocono apae tsane vino meran. Matautano bapowaxi bewa beta jinompae, xua ichamonae peyabara jume cowuntsiya nanta xeinaenexa xua pocotsiwa bapowaxi daxitan exana pocotsiwan bayatha exanapaebeiba. ¹²Barapocotsi jiwi jiwana jiton pomonae

peyawenaewi pomonaetha pomonae pejume cowuntsiwi, bapon bewa saya cae piseuri baru jijinaena. Matautano bapon bewa beta itorobiya canamataxeinaena pomonae pia bomonae matabuxuyo xua daxota bewa beta itorobiya canamataxeinaena pia pexui. ¹³Tsipei barapocotsi jiwi pomonae peyawenaewi pomonaetha pomonae pejume cowuntsiwi poxonae barapomonae beta exana pia petanacuichiwa, bapoxonae ichamonae barapomonae wuna jaintatsi beta pia petanacuichiwxaxae. Matautano barapomonae ichamonaetha cui tsacatsacapiya yabara paeba xua pia pejume cowuntsiwa xua Cristo Jesús pejume cowuntsiwatsi.

**Meje yabara po coyene xua naituta xua po coyene copiya moya
peyawun xeinaewa po coyene xua wajume cowuntsiwa**

¹⁴⁻¹⁵Bequein ichichipan xua methaunxuae cataeinchi, daichitha daxota cata tinatsi xua icha pirapaeyo tapatopaewa tsane, bapoxonae yaputaename po coyene xua jiwi bewa exanaena. Barapo coyene beta xanepanaya penabarū jinompae coyenewa Nacom peitabaratha tatsi, pomonae Nacom piamonae tatsi. Apra yabara paeban pomonae Nacom piamonae tatsi, pomonae Jesucristo pejume cowuntsiwichi, pomonae nacaetuta xua Nacom wuna pejainchiwa tsainchi, po Nacom ataya asu pepoponaein. Barapomonae yajuntu coyeneya jinompa Nacom pia pexainyei coyenewa tatsi. Matautano barapomonae yabara jume yawena Nacom pia pexainyei jume diwesi poxonae ichamonae abeya yabara paeba barapo pexainyei jume diwesi. ¹⁶Waxainchi paebatsi jeichichi: “Pocotsiwa jume cowuntatsi Jesucristo, maisa bichocono xanepana bara be po coyenewa xua moya peyawun xeinaewa, po coyenewa jiwi jopa yaputaeyo”, jeichichi. Wayabara jume cowuntsiwa baxua meje:

Nacom naexana be jiton pia juntu coyeneya tatsi, xua barapara bapon Cristo.

Nacom pia Pejumope tunaxu tatsi yabara paeba, xua bapon yabara paebatsi, xua bara bapon yatsicaewa bara Nacom.

Iru matatsunpiwi tane, xua bapon tainchi.

Bapon yabara cueicueijeichi jiwi yabara cueicueijeiji daxita nacuanpiwitha.

Daxita nacuanpiwi jiwamonae, bapon yabara jume cowuntatsi.

Yawano equeicha bapon peitaboco becaichatsi.

**Meje yabara xua pomonae naerabiya pecuidubi jiwi pomonae
seicaiya cuiduba xua ichi be jopa paxan ichiyo**

4 ¹Nacom pia Pejumope tunaxu tatsi beta xaniwaichiya jeye xua poxonae po dapae tabu ducuaena xua poxonae po dapaetha Nacom

daxita wetsina, bapoxonae pomonae pejume cowuntsi jiwi jiwana Nacom pentinchi xua Nacom pejume cowuntsiwatsi. Yawa barapomonae napuna ponaena caurimonae po caurimonae jiwi muxuitorobiya muxujainyabatsi. Matautano barapomonae exanaponaena po pecuidubiwa caurimonae pia pecuidubiwa tatsi. ²Matautano barapomonae jume naitawatsiya jume taena pocotsiwa paeba pomonae jiwi pemuxuitorobi jiwi. Barapo pemuxuitorobi jiwi cui nacopata xua bara abe exana nawita, po pejuntũ coyenetha xanepanaya natsipaeba poxonae abe exana. Daxota barapomonae jopa yaputaeyo po juntũ coyene xanepana. ³Barapomonae pomonae pemuxuitorobi jiwi, jiwi cui matawentatsi xua jitha peanaewa. Matautano jiwi jain matawentatsi xua jopa xae tsane icha penabanaewan, bequein taetha xua barapo penabanaewan Nacom tsijain exana jiwi. Pomonae pejume cowuntsiwi xuanano pomonae peyaputaewi Nacom pia pexainyei coyenewa tatsi, poxonae barapomonae najume weteiba xua natsijain jacobeiba Nacomtha, jei tsaibi: “Nacom maisa juntũ coyene weiweinan xua tana necatsiwaxaem pexaewa”, jei tsaibi, bapoxonae barapomonae bara xane barapo penabanaewan. ⁴Daxita xua pocotsiwan Nacom forota baxuan wanae. Jopa bewa naitematsi tsainchi pocotsiwa xua Nacom naca cata. Saya jame bewa noteibichi, yawano bewa Nacom natsijain jacobeibichi xua jei tsaibichi: “Maisa Nacom juntũ coyene weiweinan xua tana necatsiwaxaem pexaewa”, xua jei tsaibi tsainchi. ⁵Nacom naca tsijain betsina barapo penabanaewan, matha wayorobixae Nacom Pejume Diwesi, yawa wanatsijain jacobeibixae Nacomtha xua jei tsaibichi: “Nacom maisa juntũ coyene weiweinan xua tana necatsiwaxaem pexaewa”, wajei tsaibixaetsi.

Meje yabara xua pon Jesucristo beta tanacuitatsi

⁶Daxita barapo coyenein xuaunxuae catsipaebatsi, icha barapo coyenein tsipaebiya cuidubame ichamonaetha pomonae irũ pejume cowuntsi jiwi Cristo, bapoxonae xam pon beta netanacuichim tsane Jesucristo. Bapoxonae ichamonae cacui taena xua xam bara bichocono jinya coutha jume cowunta na-eexanaponame, yawano xua neexanaexaeno pocotsiwan cacuidubatsi po pecuidubiwa bichocono pexeinya coyene. ⁷Jume naitemare po diwesi xua saya jiwi cueicueijeji xua jopa Nacom pia diwesiyo tatsi, po diwesi xua pejemai diwesi xua jopa xapain wanaeyo. Jinya coutha nacuidubare, xua nenajuntũ coyene cana exanaexam tsane icha be Nacom pia juntũ coyene ichi. ⁸Bequein penacui jujutsiwa xanepana xua pepon daunwei penaexanaenexa, ichitha jame xua penajuntũ coyene xanepana exanaewa Nacomtha, baxua jame bichocono xanepana beyacaincha xua penacui jujutsiwa. Tsipei barapo penajuntũ coyene xanepana exanaewa Nacomtha naca yawena anoxuae poxonae cataunxuae awiya jinompatsi po cae pin nacuathe, yawa xua bexa tsaneno naca

yawenaena Nacom pia nacuatheicha. ⁹Baraxua yatsicaya apara xainyei. Daxota daxita jiwi bewa yabara jume cowuntsina po coyene xua penajuntu coyene xanepana exanaewa Nacomtha. ¹⁰Barapocotsi coyene waxainchi ajuntuyapusya daunweya exanatsi. Ichamonae naca atene exaneiba xua poxonaе abe naca yabara paebeiba, tsipei waxainchi jume cowuntsiya wunae ewatatsi Nacom, pon ataya pepoponaеin. Barapon Nacom ichichipa xua daxita jiwi pecapanenebiwa tsainchi abe pia peexanae cuiru coyenein weya tatsi. Bapon jiwi Pecapanenebiyaеin abe pia peexanae cuiru coyene weya tatsi xua pomonaе pia pejume cowuntsi jiwixaetsi.

¹¹Barapo coyenein bewa ichamonae cui itorobiname, xua necuidubiwam pocotsiwa barapomonaе peexanaewa tsane. ¹²Jopa jume naitaewatsinde xua ichamonae cayabara paeba xua poxonaе jopa cabaru cui itura jinaeyo xua poxoru nepewowixaem. Jame bewa beta exanaponaem xua necacui taeponaenexa pomonaе pejume cowuntsiwi Jesucristo. Xua barapomonaе tsita exaname, xua iru barapocotsi coyeneya peexanaenexaru. Beta cueicueijande, matautano beta poponde, yawa matautano antobe tsurucuaebiyama jiwi xua ichamonae necacui taenexa. Yawa matauta beta poponde xua bichocono jume cowuntame Jesucristo xua ichamonae necacui taenexa. Yawa beta poponde xua nejuntu coyene bichocono xanepana Nacomtha xua ichamonae necacui taenexa. ¹³Poxonaе cataunxuae jopa patopaеin tsane, jiwi peitabaratha yorobeibare Nacom pia pexeinya jume diwesi tatsi. Barapo diwesi yabara cueicueijande, matautano cuidubareno pomonaе pejume cowuntsiwi Jesucristo. ¹⁴Caena bayatha pitiri jiwi, po pitiri jiwi pejume cowuntsiwi jiwana monae, canta jayabiya caitoroba xua necueicueijejewa tsane Nacom pia pexeinya jume diwesi tatsi. Barapo pitiri jiwi canta jayaba Nacom peitorobixae. Barompaya jinya neexanae coyenewatha jopa yabara toxechiya exanaeinde po cui coyenewa Nacom bayatha cacata poxonaе barapo pitiri jiwi canta jayaba, po cui coyeneyatha neexanaewa tsane pocotsiwa Nacom ichichipa.

¹⁵Daxita barapo coyenein naitematsiya eexanaponde xua ichamonae necacui taenexa xua bara xanepanaya jume cocowuntaponame.

¹⁶Dotam xua nejuntu coyenewa cananta xeiname. Matautano dotam xua pocotsiwa necuidubiwam. Awiya beta ajuntuyapusya jume cowunta ducuaebiyama. Icha baxua exanaename jinya coutha nacapanepa exanaename xua Nacom cacapanepaena petupae cuiru coyene weya. Iru barichim tsane capanenebiya exanaename xua Nacom capanenebiyaena pomonaе necajume naitaewatsiwi.

**Meje yabara xua pocotsiwa Timoteo bewa cuidubina
pomonaе Jesucristo pejume cowuntsiwichi**

5 ¹Jopa jume itawetsinde pon pitirin. Jame saya bewayo muxuwere icha be ichim xua poxonaе axa bewayo muxuwetame. Barichinde

pewowi saya bewayo muxuwere icha be ichim xua poxonae eweicho jiwi saya bewayo muxuwetame. ²Pitiriwaxi saya bewayo cuidubare icha be ichim xua poxonae ena saya bewayo cuidubame. Matautano saya bewayo cuidubare penawaxi icha be ichim xua poxonae amcho jiwi saya bewayo cuidubame xua tsita auram. Juntũ coyene xanepanaya yabara nanta xeinare barapowaxi, xua jopa abe neexanaewam.

³Nacom piamonae, pomonae pejume cowũntsiwi, barapomonae bewa yawenaena powaxi pecuenta werapaewaxichi piseuriwi, saya jame poxonae barapowaxi jopa xeinaeyo piamonae tatsi, pomonae peyawenaewichi. ⁴Icha ichawayo powayo pecuenta tupaewayotsi piseuri, icha bapowa pipexui xeina yawa ichacuiitha icha xeina pia pemomo jiwi, barapomonae bewa yawenaena barapowatha. Barapomonae copiya bewa nacuidubina xua Nacom cui itoroba xua bewa ba tsita barũ cui itura jinaena bapowatha. Barapo coyene tsita exaneibina xua poxonae yaweneibina bapowatha. Barapomonae bewa yawenaena bapowatha xua bapowa piamonaexae tatsi. Bapoxonae bapowa jopa nantawenonae tsane xua ichamonae bapowa peyawenaewatsi. Barapomonae bewa antobeya apatsina xua bapowa antobeya apatsinchi be pentoma xua caena bayatha copiya pia peantobeya apatsixaetsi poxonae pexui. Jame barapo coyene Nacom tsita coyene xanepanatsi, matautano barapo coyene Nacom juntũ coyene weiweina exanatsi. ⁵Powa bara xaniwaicha pecuenta tupaewayotsi piseuri, powa xaniwaicha compa, powa jopa xeinaeyo piamonae matabũxũ pomonae peyawenaewichi, bapowa jume cowũntsiya wũnae ewata xua Nacom yawenaena xua bapowa yawenaeinchi. Pebaxuanexa tsane bapowa wũqueiba Nacomtha merawintha, yawa maticabintha. ⁶Ichitha nama powa pecuenta tupaewayotsi piseuri, powa saya pia coutha nayabara nanta xeina nawita xua penasiwaiminchiwa pebiwitha, bapowa saya jopa nanta xeinaeyo xua jume cowũntsiya wũnae ewatsina Nacomtha, xua peyawenaewa tsainchi. Daxota bapowa pia juntũ coyene tatsi be tupa, xua Nacom be tsita tũpatsi bara bequein bapowa popona. ⁷Daxota xua ichamonae jopa abeya peyabara paebinxã pomonaetha pomonae pejume cowũntsiwi, cuidubare barapo peyawenaeyo coyenewa barapomonaetha pomonae pejume cowũntsiwi. ⁸Meje xua pocotsiwe baxue: Icha pon jopa yabara nanta xeinaeyo xua piamonae peyawenaewa tsane, bapon apara bara exana be poxonae jopa jume cowũntsiyo. Bapon apara bichocono ajuntũcoyeneyapubeya exana, beyacaincha pon jopa jume cowũntsiyo, pon daichitha piamonae yawena.

⁹⁻¹⁰Barapo paperatha, po paperatha ichaxota saya wũn dubatsi powaxi pecuenta werapaewaxichi piseuriwi, barapo paperatha wũn tinadubare. Saya wũn tinadubare powaxi xua beyacaincha sesenta po weibe xeina, powaxi xua caena bayatha cae pebintha cuicuina, matautano wũn tinare powaxi xua ichamonae yabara paeba xua pinae bapowaxi xanepanaya

exana. Pocotsi coyenein xua poxonae barapowaxi xua xanepanaya exana baxue meje: Bapowaxi beta wichita pia pexui; yawa bapowaxi beta matenta weiweinaya apateiba pomonae petapateibiwichi pia bontha; yawa bapowaxi taxu quiateiba pomonae pejume cowuntsiwi Cristo pomonae petapateibiwichi pia bontha; yawa bapowaxi yaweneiba pomonae peacopeibi jiwi; yawa bapowaxi daxita carepaya coyeneintha exaneiba po coyenein bichocono jiwi tsita xanepanatsi.

¹¹Ichitha jopa wun tinaeinde powaxi cataunxuae taacoibichi xua xeina sesenta po weibe. Tsipei ichacuitha bapowaxi junteinaetsipa pocotsiwa bayatha Cristo yabara tsiwunae muxu duta xua jopa equeicha penotsiwa icha pebiwi. Bexa barapowaxi equeicha icha pebiwi benotsipa. ¹²Barapowaxi Nacom yabara paeba xua pinae barapowaxi barapara natsicuenta xua abe peexanaexae, poxoru jopa exanaeyo pocotsiwa bayatha yabara tsiwunae muxu duba Cristotha pocotsiwa xua exanapaeba. ¹³Matautano barapowaxi fifina, jopa ichichipaeyo xua penacuichiwa daxota saya daxita bontha siwa poneiba, matauta saya cueicueijeji tsurubenaebiya xua ichamonae peyabara paebiwatsi pocotsiwa xua jopa xapain pexeinya diwesiyo. Matautano barapowaxi fayacota dubenanaebiya ichamonaetha. ¹⁴Daxota powaxi piseuriwi pecuenta werapaewaxichi, powaxi xua penawaxi, xan saya nanta xeiinan xua barapowaxi barabun moya jitha enaena equeicha. Barabun moya equeicha xexinaponaena pexui, yawa moya barabun xua pia boxi bara beta ewatsina. Matautano barapowaxi jopa bewa abe exanae xua daxota ichamonae pomonae jiwi peaitafaetabi jiwi abe yabara paebina xua abe yabara paebinchi pomonae pejume cowuntsiwi. ¹⁵Barapowaxi jiwana powaxi penawaxi powaxi pecuenta werapaewaxichi piseuriwi, barapowaxi bayatha bara apara exana dubenanaebiya pocotsiwa xua caurimonae pia pentacaponaein tatsi cui itoroba, pon Satanás.

¹⁶Icha petsiriwa, powa pejume cowuntsiwayo Jesucristo, icha bapowa tapopoinchi pia botha pijimonae jiwawayo tatsi powayo pecuenta tupaewayotsi piseuri, barapo pejume cowuntsiwayo bewa yawenaena bapowatha. Barapo pejume cowuntsiwayo jopa bewa copatsi tsane xua pomonae pejume cowuntsiwi apatsina pexaewa bapowatha, powa pecuenta tupaewayotsi piseuri. Bapoxonae pejume cowuntsiwi itacupatsi xua yawenaena powaxi xua xaniwaicha pecuenta werapaewaxichi piseuriwi xua powaxi jopa pexeinaexae piamonae matabunxun jiwi tatsi pomonae peyawenae jiwichi.

¹⁷Pomonae pejume cowuntsiwi bewa bichocono xanepanaya barun cui itura jinaena xua pitiri jiwi barun cui itura jinaeinchi, po pitiri jiwi betiya xanepanaya canamataxeinatsi pomonae pejume cowuntsiwi. Po pitiri jiwi cueicueijeji Nacom Pejume Diwesi, matautano xua cuiduba barapo diwesi, barapo pitiri jiwi bewa bichocono xanepanaya barun cui

itura jinaetsi yawa bewa pentoma catsibichi beyacaincha icha pitiri jiwi. ¹⁸Nacom Pejume Diwesitha jeye: “Duwein pon pewan buey, pon pexu xu tanacaponaxua poxonae nacuitapona jopaxu wano atsinde pocotsiwa bapon taayapubetsi poxonae nabusi matomaxaexaepona pentacona”, jei. Equeicha Nacom jeye: “Ponba tanacuita ichun bapon nantawenona xua xeina pia petanacuichiwa matoma”, jei Nacom.

¹⁹Jopaxu cui yopichinde pitirin xua abe exana pon pomonae pejume cowuntsiwi canamataxeinatsi icha jopaxu xeinaem dos poyobe xua iruru cui taneru xua ichacuitha tres poyobe xua iruru cui taneru pocotsiwa barapo pitirin xua baxua bara exana.

²⁰Ichitha pitirin pon cataunxuae abe exanapona, bewa cui yopichiya itawetsim bapon xua daxita pomonae pejume cowuntsiwi peitabaratha tatsi, xua bapoxonae iru ichamonae pejunuwinxaxua abe peexanaewa, icha be poxonae xua bapon ichi.

²¹Caitorobatsi Nacom peitabaratha tatsi yawa Jesucristo peitabaratha tatsi. Matautano caitorobatsi matatsunpiwi peitabaratha tatsi, po matatsunpiwi Nacom itapeta. Exanaponde barapo tacaitorobi coyenewantsi ichitha jopaxu xeinaeinde po juntu coyenewathaxua nanta xeiname xua caein pebin bichocono peainya cuin beyacaincha ichun. Icha barapocotsi juntu coyenewathaxu cayabara nanta xeinaeya exanaetsipame jopaxu xainyeyaxanaetsipaem. ²²Abu bepijawa jopaxu mata jayabinde pitirin, xua pecanamataxeinaenexatsi pomonae pejume cowuntsiwi, tsipei icha bapon abe exanaetsipaxu apaxu baxua be iru xam yawename xua bapon abe peexanaewa. Dotam jinyaxu coutha beta xanepanayaxu najuntu coyene eenare xua abe neexanaeyainwa.

²³Bichocono necotsoroxaewa, yawa bichocono neparaxaewa, jopaxu sayaxu meisaxu apaeinde mera. Jame moyaxu tsiwiyo yawa muxunaxu apare vino merayo.

²⁴Ichamonae cui taneme abe pia peexanae cuiru coyenewan tatsi, pewunaeyaxu po mataqueithaxu poxonae Nacom yabara paebinaxu jiwixu penatsicuentiwxu abe peexanaexae. Ichitha namaxu anoxuae jopaxu ichamonae cui taem abe pia peexanae cuiru coyenewan tatsi, apaxu jame bexaxu yaputaenamexu po mataqueithaxu poxonae Nacom yabara paebinaxu jiwixu penatsicuentiwxu abe peexanaexae. ²⁵Barichixu pocotsiwxu jiwixu xanepanayaxu exanaxu ichamonae nexaxu, baxuaxu baxu jiwixu anoxuae cui tane. Bequein ichacuithaxu barapocotsixu xanepanayaxu peexanae coyenewan jiwixu jopaxu cui taeyoxu anoxuae, ichitha bexaxu tsanexu jiwixu taenaxu barapoxu coyenewan, tsipeixu poxoruxu barapoxu coyenein jopaxu bapanaxu atayaxu tsitecaeyaxu moyaxu peyawun xeinaewa.

6 ¹Pomonaxu baxu pebusixu cui tatayebeibiwichixu, pomonaxu pejume cowuntsiwxu Jesucristo, xua pomonaxu amanayaxu tanacuitaxu pia pecanamataxeinaewichixu, po pecanamataxeinaewichixu jopaxu jume

cowantsiyo Jesucristo, barapomonaē ba bewa barū cui itura jinae pia pecanamataxeinaewichi. Bewa baxua exanaena xua barapomonaē pomonaē pecanamataxeinaewi jopa abe peyabara paebinea Nacom pia cui coyenewa tatsi, matautano xain jopa abe peyabara paebinea pata pecuidubiwa xua pocotsiwa pacuiduban Jesús yabara. ²Ichamonaē pomonaē pebusi cui tatayebeibiwichi, pomonaē pejume cowantsiwi Jesús, barapomonaē xeina pia pecanamataxeinaewichi, pomonaē irū jume cowanta Jesucristo. Barapo pebusi cui tatayebeibiwichi jopa bewa exanae po coyene xua poxonaē jopa xeinaeyo pebaru cui itura jinae coyenewa pia pecanamataxeinaewitha, xua be cae peweicho penatsicotae jiwixae xua pejume cowantsixae Cristo. Jame barapo pebusi cui tatayebeibiwichi bewa barū cui itura jinae pia pecanamataxeinaewichi. Matautano bewa beta tanacuichi barapocotsimonaē, beyacaincha ichamonaē pomonaē jopa jume cowantsiyo Jesucristo pomonaē pebusi cui tatayebeibiwichirū pia pecanamataxeinaewichi. Barapo pebusi cui tatayebeibiwichi bewa beta tanacuichina pia pecanamataxeinaewichi, peyawenaenexa barapomonaē pomonaē irū jume cowantarū Jesucristo. Matautano bewa beta tanacuichina tsipei Nacom antobe barapomonaē, xua antobetsi barapomonaē pomonaē pia pecanamataxeinaewichixaetsi.

**Meje yabara xua waxeinaewa pepa pexainyei
coyenewa xua apara wajume cowantsiwa**

Barapo cui coyene cuidubare jiwitha xua jiwi beta peexanaewa tsane: ³Ichacuitha ichun cuiduba pocotsi coyenewa xua penaerabiwa. Matautano jopa yabara barū jume jejeyo po pexeinya pecuidubi coyenewa Jesucristo pia pecuidubi coyenewa tatsi, pon Wanacanamataxeinaein. Matautano bapon pon ichun jopa yabara barū jume jejeyo po pecuidubi coyenewa xua Nacom juntu coyene xanepana exana jiwitha. ⁴Pon ba bara pocotsi coyeneya exana bara apara pon jiwi peabin xua peyaputaenxae. Bapon apara ichitha jopa peyaputaein. Bapon naemata yainyaba nawita ichamonaetha pia xua jiwi penajume matsontsonobinexa bapontha. Daxota barapomonaē nantiya nauwa. Matautano barapo jiwi nantiya naba. Matautano barapo jiwi nantiya abeya nayabara paeba. Matautano nantiya abeya nayabara nanta xeina. ⁵Po pebiwi jopa xanepanaya nanta xeinaeyo, barapo pebiwi najume matsontsonoba nawita. Barapomonaē jopa yaputaeyo pocotsiwa pexainyei coyenewa. Bapomonaē najei pia coutha: “Icha jan tsane: ‘Jume cowantan Jesucristo’, jan tsane bapoxonaē xain copei nawita xeinaein”, najei barapomonaē pia coutha. ⁶Bara xaniyei, poxonaē Jesucristo jume cowantatsi baxua bara bichocono naca yawena. Ichitha saya naca yawena icha waxainchi muxuna xeinatsi wajuntu coyeneintha xua beta juntema wajinompawea bequein xua naacopeibi taethatsi. ⁷Tsipei poxonaē naexanatsi jopa

cayawa naexanaetsi barapo copei po cae pin nacuathe. Matautano tsipei poxonae werapaeinchi jopa barapo copei cawerapae tsainchi. ⁸Ichitha icha xeinatsi pexaewa, yawa paparuwan bara bapoxonae bewa jüntema jinompaeinchi. ⁹Seicaya nama pomonae bichocono ichichipa xua copei pexeinaewa, barapomonae exana pocotsiwa caurimonae pia pentacaponaein tatsi jüntu coyene jujuta. Daxota barapomonae exana pocotsiwa xua ichichipa, xua jopa wunaeyo, xua pocotsi coyenewatha abeya pia coutha nacana exana. Baxuan exana pocotsi coyenewatha xua barapomonae peweraweracaewa tsane. ¹⁰Poxonae jiwi bichocono ichichipa paratixi, bapoxonae tamropata notarucupa xua bichocono abe peexanaponaewa. Barapo peichichipae coyenewa paratixi, jiwi cana exanatsi xua pepentsiwa po coyene xua Jesucristo pejume cowantsiwatsi. Daxota barapomonae be pia coutha najüntu coyene jopojopei exana xua saya peyabara nanta xeinaexae paratixi, xua peichichipaexae paratixi.

**Meje yabara xua bewa Timoteo beta ajüntuyapusuya
jume cowanta ducuaenaebiyaena**

¹¹Tsipei xam Timoteom Nacom piamonae tatsi jiwanam, baxuan cuitaya naetsiriware, pocotsiwa po coyenewatha weraweraca necaexanaewa. Beta ponde Nacom nexa xua nejüntu coyene xanepanaewa tsane Nacomtha. Eexanaponde pocotsiwa Nacom ichichipa. Jume cowanta ducuaenaebiyama Nacom, yawano antobe tsurucuaenaebiyama Nacom, yawa jiwithano. Matautano saya jüntema poponaeya exana ducuaenaebiyama pocotsiwa Nacom caitoroba poxonae ichamonae bequein cata abe exana. ¹²Xanepanaya antuyapusuya jume cowantsiya exana ducuaenaebiyama pocotsiwa Nacom ichipa. Peantuyapusuwa po peantuyapusuwa ataya tsiteca, barapo peantuyapusuwa jopa copatsinde xua necajüntu coyene weaichurucuaewa. Barapo peantuyapusuwa Nacom cacata. Xam baxua xanepanaya yabara paebame pin bicheitha. ¹³Catsipaebatsi Nacom peitabaratha, pon pia peantuyapusuwa cata daxitan coyeneintha. Matautano catsipaebatsi Jesucristo peitabaratha, pon beta jume nota, xua pon Poncio Pilato beta jume notatsi. ¹⁴Caitorobatsi xua neexanaewa tsane pocotsiwa catsipaebatsi. Beta xeinare Nacom pia peitorobi coyenewa xua jopa icha coyeneya yabara cuiya exanaem tsane. Exande barapo peitorobiwa xua jopa Nacom abeya necayabara paebiwa tsane xua abe neexanaewam. Baxua eexanaponde, beya poxonae Jesucristo equeicha patopeicaena pon Wanacanamataxeinaein. ¹⁵Poxonae po mataqueitha Nacom ichichipaena bapoxonae barapo mataqueitha Jesucristo naitatsina jiwitha. Jiwi yaputaena xua bapon Nacom meisa compa xaina daxita peayapusu itorobi coyenewan. Bapon meisa compa peyawa jinaein pejüntu coyene weiweinae coyenewa. Bapon pon jiwi itorobiya pia pepa Peewatsinchi

tatsi pia peayapusu itorobi coyenewa xeina beyacaincha xua ichamonae xeina pomonae jiwi itorobiya pia pepa peewatsiwichi xua iru xeina pia peayapusu itorobi coyenewa. Matautano bapon pon jiwi pia pepa Pecanamataxeinaeinchi pia peayapusu itorobi coyenewa xeina beyacaincha xua ichamonae xeina pomonae jiwi pecanamataxeinaewichi. ¹⁶Barapon Nacom meisa compa peyacuiya jinaein peantuyapusuwa po peantuyapusuwa xua ataya jopa peweraweracaewa. Barapo Nacom pecoicha yawa popona po pecoicha bichocono daunweya pentha. Baxota jiwi jopa itacupaetsi xua imoxoyo peponaewa xua bichocono pecoicha pexeinaexae. Dapon aibi, pon bayatha tainchi Nacom. Matautano dapon aibi pon itacupatsi xua Nacom petaewatsi tsainchi. Barabu jiwi Nacom baru cui itura jinaeinchi, xua ataya tsane. Matautano barabu Nacom itorobina jiwitha pia peayapusu itorobiwatha xua bara ataya tsane. Je bara ichi tsane.

¹⁷Pomonae xua bichocono copei pexeinae jiwi itorobare xua jopa ichamonae aebi tsainchi. Matautano itorobare xua jiwi jopa pecayabara nanta xeinaewa tsane paratixi xua barapo paratixitha peyawenaenexa tsainchi xua daxota barapomonae jopa Nacom canantawenonae tsainchi. Tsipei paratixi saya bichoina nacaewita daxota barapomonae bewa jume cowuntsina Nacom, pon jopa juniya naca cataponaeyo daxita pocotsiwa xua po coyenein nantawenonatsi xua wanaca juntu coyene weiweina exanaenexa. ¹⁸Cui itorobare barapomonae pomonae copei pexeinaewi xua xanepanaya peexanaewa tsane. Matautano barapomonae itorobare xua nawita pexeinaewa tsane pocotsiwan xua xanepanaya peexanae coyenewan, icha be juta coyeneya ichi poxonae copei nawita xeina. Barapomonae bewa piawa jiwana wecaenaetsina xua ichamonae pecatsibiwa tsainchi pomonaetha pomonae xua jopa xeinaeyo xua pocotsiwan nantawenona. Matautano barapomonae bewa yawenaena piamonae. ¹⁹Icha barapomonae barapo coyenein exana, bapoxonae barapomonae pia coutha nayawena xua nacui wunaeta pocotsi coyenewa xua bexa tsane, xua daxota bapoxonae pexeinaewa tsane peajuntuyapusuwa, po peantuyapusuwa xua ataya tsiteca.

Meje yabara xua Pablo najume wetsiya paeba

²⁰Xam Timoteom, xaniwaicha xeinaeya capoponde po pecuidubiwa Nacom cacata. Jopa jume naitaewatsinde po jumein xua bapana jiwi jopa yawenaetsi. Matautano jopa jume matsontsonoba exanaeinde ichamonaetha pomonae yabara cueicueijej peocotsiwa xua peyaputae coyenewa, po peyaputae coyenewa jopa xaniwaicha peyaputae coyenewiyo. ²¹Pomonae jume cowunta pocotsiwa poxonae yabara cueicueijej peyaputae coyenewa, barapomonae jiwana nacui barapenta po coyene xua Jesucristo pejume cowuntsiwatsi.

Barabũ Nacom pon jiwi Pecanamataxeinaein, bichocono cayawenaena
pia necaantobexae.

Baja Pablo.